

■ FRACZIUN PCD EN IL CUSSEGL GROND

Gea a l'autonomia communal

(cp) La fracziun da la Partida cristian-democratica (pcd) ha salvà sia sesida da sa preparar sin la sessiun dal cussegl grond da quest mais en il Plantahof a Landquart. Ella è vegnida presidiada da deputà Marcus Caduff. Stà preschent è era cuss. gov. Mario Cavigelli. Unanimamain ha la fracziun decidì da na suttametter las regiuns e vischnancas a la lescha da publicitad. Quai fiss ina clera violaziun da l'autonomia communal. Ins ha numnadamain gi grondas resalvas che documents na pudessian uschia betg vegnir anonimisads, senza tangar tschertas persunas. Era las expensas fissian memia autas. Ma las vischnancas duajan sezzas decider sch'ellas veglian introducir la lescha da publicitad u na. Sche las vischnancas duessian tuttina vegnir suttamessas a la lescha da publicitad, sco la minoritad da la cumissiun pretenda, cumbattess e refusass la pcd la lescha en la votaziun finala.

Sustegn per il program da la regenza

La fracziun da la pcd sustegna da princip il program da la regenza sco er il plan da finanzas 2017–2020. Insaquants temas tegna la fracziun per zunt impurtants. I sa tracta da la planisaziun spaziala, da las scolas medias ed autas sco era da la forza idraulica ed il forestalessen. Pertutgant la planisaziun spaziala vegn constatà che terren da bajegiar n'astgia

betg vegnir transferì da las regiuns en ils centers. Ins vul ina gulivaziun entaifer las regiuns. Attenziun speziala e grond sustegn dat la fracziun a la forza idraulica. Quella pateschia da preschent dals bass pretschs. Ma ins vul tuttina promover quella energia regenerabla er en l'avegnir.

Cunter da reveder total la lescha da scolas medias

Unanimamain refusa la fracziun da la pcd la prevedida revisiun totala da la lescha da scolas medias. Pir l'october 2014 è quella vegnida revidida parzialmain. Cun ferm sustegn da la pcd han ins gi cuntanschì alur in bun cumpromiss per las scolas medias. Quellas en numnadamain vegnidas messas finanziailmain a pèr cun la scola chantunala. Ina eventuala aboliziun dal progimnasi vegnissia cumbattida cun tuts meds.

Plan da finanzas 2017–2020

La fracziun da la pcd fa quitads pervi da las finanzas chantunalas per la proxima perioda 2017–2020. Ella regorda dentant ch'il chantun haja in solid agen capital. Quai dettia insaquantas pussaivladads. Ins na duessia betg reducir memia zunt. Programs chantunals da conjuntura duessan esser pussaivels senza ch'els fissan dependents da la confederaziun. La fracziun vegn pussaivlamain a far ina proposta en quel senn.